

2 TIMOTEO

Timoteodih ã túyat tútat

¹ Weém, Pablo, Jesucristoíh doonádih Dios ã naáwát túttni jamna, nin náodih meém Timoteodih wã jwúub daác wahna caá. “Nihat Jesucristodih jepahnit wãjeéh ï táí jumbipna caá”, ã niijátjidih bitadih Dios weemdíh ã naóh bohéat tútup jĩ. ² Timoteo, wã wãúh panihni ma jumuchah, meemdíh búdí wã oina caá.* Dios jwĩ íp, jwĩ Maáh Jesucristo biícđih meemdíh oinit, ï jĩgah en teo wáaca naáh, ma táí jumat pínah niijná.

Pablo Diosdih “Túina caá”, ã niiját

³ Diosdih úbhna, yeó jáap, chei jumat pahbut meemdíh wã úbhna caá. Pánih úbhnit, “Timoteodih búdí ma teo wáacatđih túina caá, Paá”, wãpĩ niijná caá. Caán Diosdih tigaá jwĩ nuowã wēinit, ípĩ jepahat pahjeh mantih, weembát caandíh wēinit, wã jepahna caá. Pánih jepahnit, dedé yeejép chãjat peéh weemdíh ã wihcatđih wã jéihna caá. ⁴ Con láa meemdíh wã cádah bejehah, ma jũñátjidih náhninit, majeéh jamnit, táí weñat tút niijná, meemdíh wã jwúub eníhna caá. ⁵ Meém Jesúsđih ma táí jenah joyátđih wã náhnina caá. Ma éet Loida, ma ín Eunicebat Jesúsđih ït jwĩh jepahap tajĩ. Pánihna, queéđđih en yacnit, meembát caandíh ma táí jenah joiná caá.*

* **1:2** Hch 16.1; 1Ti 1.2 * **1:5** Hch 16.1

⁶ Meemdih wã teo jãha uúbúchah, Dios meemdih ã wêpatdih búdí át wûhup jĩ, ã wutah pah bitadiah ma túi teo wáacah pínah niijná. Páant ã chãjatjidih náhninit, úumcanjeh, ã wêpatjĩh bitadiah chah ma teo wáacá. ⁷ Dios jwiútdih Túini Espíritudih át wûhup be, jwĩjeéh ã jumat pínah niijná. Pánih jwĩjeéh jumni Túini Espiritu jwiútdih búdí ã teo wáacna caá, cãacwã ded pah ĩ jenah joyátdih jwĩ úumcat pínah niijná. Páant ã teo wáacachah, cãacwãdih oinit, ã wêpatjĩh queétdih jwĩ jéih teo wáacna caá. Caán Túini Espiritujeh jwiútdih ã túi jenah joyát túutna caá. ⁸ Pánihna, jwĩ maáih doonádh bitadiah naóhna, ma tíic jenah joicá bojoó. Weém áih doonádh wã bohéat jíib nemat muúboó wã jumuchah, wã chéen ma jumatdihbut ma tíicca bojoó. Obohjeéhtih, túini doonádh ma bohéat jíib meemdihbut yeejép ã yapachah, “Á túimi nacaá”, ma niiji. Páant ã yapachah, Dios meemdih ã teo wáacahpna caá, caandih ma cádahcat pínah niijná. ⁹ Jwiút iiguípna bejnit déejidih Diosjeh jwiútdih át túi ubup wut jĩ. Pánih túi ubnit, jwiútdih át níwip wut jĩ, áihwã jumnit, jwĩ túi chãjat pínah niijná. Obohjeéhtih, jwĩ túi chãjat jíib át níocap wut jĩ. Nin baácdih ã chãjat pínah jãtiah ã jenah joyátjia pah jwiútdih oina, át níwip wut jĩ. Pánih oina, jwiútdih túi ubni pínah Jesucristodih ã wah deyaat pínahdih át jenah joyóp wut jĩ. ¹⁰ Pánih jenah joiníjia caandih wah deyana, ã oyatdih jwiútdih ã túi jéihyana caá. Páant ã wah deyani Jesús jwiút áihwãdih iiguípna jwĩ bejat déejidih át túi ubup wut jĩ. Caán Jesúsdi h jepahna, páantjeh Diosjeéh jwĩ túi jumat pínah doonádh jwiútdih naáwádh át dei jãúwáp wut jĩ.

11 Weemdih ñíonit, Dios ã wahap jĩ, caán túini doonádih wã naáwát pínah niijná.* 12 Páant ã wãtatdih wã jepahatji jíib bũũ nin nemat mũúboó jumnit, yeejép wã yapna caá. Obohjeéhtih, pánih yeejép yapna yũhna, wã tíic jenah joicán caá. “Wã jepahni Jesús túi wẽpni jumna, ãih doonádih naáwát túutnit, weemdih ã túi teo wáacipna caá. Páant ã teo wáacachah, púú ã jwúub dei jũwúchahna, caandih túi jenah joí cádahcan, páantjeh ãih doonádih wã naóhbipna caá”, wã niij jenah joiná caá.

13 Meémboó Jesucristodih túi jenah joiná, caandih oinit, meemdih yoobópdih wã bohéatji pah ma chãj cádahca bojoó. 14 Jwĩjeéh jumni Túini Espíritu ã teo wáacatjĩh Dios meemdih ã naáwát túutnidih yoobópdih ma bohénaá. Caandih túi náhninit, mácah ma bohéca bojoó.

15 Nihat Asia baácdih moón Jesúíhwã weemdih cádah tigaá ít chãjap. Pánih tigaá ã jwúub jígochcap. Íjeéh Figelo, Hermógenes wũt jumnitbut ã cádahatdih ma jéihna caá. 16-17 Páant queét nihat weemdih ã cádahachah yũhna, Onesíforoboó dawá láa weemdih enedih junít, ã túi weñanap be. Nemat mũúboó wã jumuchah yũhna, Roma tútchiboó junít, wã chéen ã jummatdih tíic jenah joicánjeh, weemdih maatápdih bidniji weemdih ã bid juyép jĩ. Páant weemdih ã túi teo wáacat jíib, ã déewãdih jwĩ Maáh ã jĩgah en teo wáaca naáh. 18 Éfeso tútchiboó jwĩ jumuchah, weemdih búdí ã teo wáacatjidihbut ma túi jéihna caá. Pánihna, jwĩ Maáh Jesúsdi h búdí wã úbhna caá, nin baácboó

* 1:11 1Ti.2.7

jwáub dei jũóhnit, caandíh búdí ã jĩgah en teo wáacat pínah niijná.

2

Jesúh tãini soldado panihni

¹ Meémoó, wã wãúh panihni, Jesucristo meemdíh oinit, ã teo wáacachah, caandíh ma túi péenaá. ² Dawá wã bohéátdih joiníji meem jwúh bitadih ma bohénaá. Páant queétdih ma bohénachah, Dios ã náahat pah túi chãjnit, bitadih bohé jéihnitbut ã jũmũ naáh.

³ Soldadodih bũwat ã jũmũchah yũhna, ã cádahcat pah mũntih, meemdíhbut biíc yoobó ã yapachah, Jesúsdi h ma cádahca bojoó. Jwiít ni hat Jesúhwãdih biíc yoobó ã yapna caá. ⁴ Ded soldado ã maáhdih weñá hna, ã wũtat pahjeh caá ã chãjap. Soldado nihcanni ã chãjat pínahdih páantjeh chãjna, ã maáh ã wũtat pah áta jéih chãjcan tagaá. Pánihna, soldado ã chãjat pah mũntih, meembút Dios ã weñat pínahdihjeh jenah joinít, ã wũtat pah ma túi chãjaá. ⁵ Pánihat dée, ded ñáoni maáta ã wũtat pah túi chãjni jeh, ã wẽp ñáwat jíibdi h ã jéih bíbohna caá. Pánihna, ñáoni ã túi chãjat pahjeh mũntih, Jesucristo ã wũtat pah ma túi chãj cádahcat jíib, ã pebhna ma jũibínachah, meemdíh túinidih ã wũhbi pna caá. ⁶ Pánihat dée mũntih, wápchi túi teoniboó ã tewat jíib jeémátdih jwíih bíbohah caá náahap. Pánihna, Dios meemdíh ã wũtat pah ma túi chãjat jíib, ã pebhboó ma jũibínachah, meemdíh wẽinit, ã túi chãjbi pna caá. ⁷ Wã niijátjidi h ma túi náhninaá. Páant ma náhninachah, jwĩ Maáh meemdíh ã túi jéihyabi pna caá.

⁸ Ded pah Jesucristo ã jumatjidih ma quíib buudcá bojoó. Caán maáh David jumima ãt jumap wat jĩ. Wunna yuhna, ã jwúub boo pad júúwátji táini doonádih wãpĩ bohénap jĩ. ⁹ Pánih caandíh wã bohéat jíib, yeejép chãjnitdih ĩ nemat pah, weemdíh ĩtah tãpjĩh chéonit, nemat muúboó ĩ nemechah, wã moh yéejna caá. Pánih jumna yuhna, Dios naáwát dih wã bohé cádahcan níit. ¹⁰ Dios ã ñionitdih bohéna, yeejép wãpĩ yapna caá, queébtat Jesucristoíhwã ĩ jumat pínah niijná. Āihwã iiguípna bejnit déejidih ã túi ubnit pínah ĩ jumuchah, queét Diosjeéh ĩ túi jumbipna caá.

¹¹ Nin naáwát yoobóp dih caá:

Cristo jwĩ yéejat jíib ã wun wūhat pah mantih, jwiítbat ãjeéh wunnit panihnit, yéejatdih cádahnit jwĩ jumna caá. Pánih cádahnit, ãjeéh jwúub boo pad júóh nit panihnit, ãjeéh páantjeh jwĩ jumbipna caá.

¹² Āihwã jwĩ jumat jíib yeejép yapna yuhna, ã náahat pah jwĩ chãj cádahcan, ã maáh jumapboó caán bíicdih jwiítbat maáta jwĩ jumbipna caá.* Obohjeéhtih, “Jesucristodih wã jéihcan caá”, jwĩ niijíchah, caanbút jwiít dih bíic yoobó ã niijbípna caá.*

¹³ Jwiít jwĩ niijátji pah jwĩ chãjcah yuhna, caánboó ã niijátji pahjeh ã chãjbipna caá. Yeecanni jumna, ã niiját pahjeh chãjni ã jumna caá.

Diosdih túi teo wāhni ded pah ã jumat

¹⁴ Majeéh jumnit Jesúíhwādih buutéh wã naáwát dih ma túi náhnianaá. Dios ã enechah,

* **2:12** 1P 5.1 * **2:12** Mt 10.33; Lc 12.9

queédih ma míc jūihcat túutú. Ī jengah joyátjīhjih ĩ míc jūihñachah, dedé pínah nihcan caá. Pánih jūihna, teo wáaccan, míc yéejana caá ĩ chājap. Ī míc jūihñatdih joinít, ĩ bəwa jengah joiná caá. ¹⁵ Dios naáwát dih túi jéihnit, caán meemdih ā wətat pah, bitadih āih túini doonádih yoobópdih ma bohénaá. Páant ma chājachah ennit, “Ma túi chājna caá”, Dios ā niijíchah joinít, ma tíccan niít.

¹⁶ Diosdih jéihcannitboó ĩ jengah joyátjīhjih ĩ míc wéhenachah, ma joyáh bojoó. Páant ĩ míc wéheat dedé pínah nihcah, chah ĩ yéej chāj bipna caá. ¹⁷ Páant ĩ yee bohéat, yahwít ā moóp aabát pah, bitadih ĩ yéejana caá. Páant tigaá Himeneo, Fileto wūt jumnitbut ĩt chājap. ¹⁸ Páant ĩ yee bohéatdih joinít, Dios naáwát yoobát dih ĩt cádahap wūt jī. Pánih cádahnit, “Jesúhwā jáantjeh ĩtát pūuh laab béjep be”, queét ĩt niij yee bohénap wūt jī. Pánih mácah bohénit, biquína Jesúhwādih ĩ yéejanachah, caandih ĩt cádahap wūt jī. ¹⁹ Obohjeéhtih, páant ĩ yee naóh bohénachah yuhna, Dios naáwátboó yoobópdih ā jumna caá. Caán ā túut nūumcán niít. Páantjeh biíc yoobó ā jumbipna caá. Nin pah Dios naáwát dih naóh yapani āt niij daacáp tajī: “Jwī Maáh āihwādih ā jéihna caá”, āt niij daacáp tajī.* “Jesús wā Maáh caá”, niijnítboó, yeejép ĩ chājatdih ĩ cádaha naáh”, biihboó āt niij daacáp tajī.

²⁰ Jwiít Jesúhwā nin pah caá jwī jumap: Búdí mūúboó dawá pamapna ā jumna caá. Biquína oro, platajih ĩ chāj niji jum, biquína máa naá, wáam déepjih ĩ chāj nijibut ā jumna caá. Pánihna, caán mūú mínah cācwādih numah jeémpnit, āih oro, platajih

* **2:19** Nm 16.5; Jn 10.14; 1Co 8.3

ĩ chãjniji pamapnadih wëi ennit, ĩ jeémát pínahdih ã cáagna caá. Obohjeéhtih, máa naá, wáam déepjĩh ĩ chãjnijiboó yeó jáap jumat pah jeémát cáagat pínah, ĩ yohnidih ĩ yacat pínahbut ã jumna caá. ²¹ Pánihat pah, ded yeejép ã chãjatdih cádahnit, oro, platajĩh ĩ chãjniji pamap panihni jumna, jwĩ Maáh ã weñat pínahdih ã jéih chãjbipna caá. Páant ã chãjachah, jwĩ Maáh caandíh ã wëi enbipna caá.

²² Meémboó jáap jumna, japata ĩ yéej chãj ñinahatdih enna, iinít, biáboó ma bejeé. Pánih iinít, táiniboodíhjih chãjna, jwĩ Maáh Jesúsdi h chah jenah joinít, bitadih ma túi oyoó. Pánih oinit, míic jũihcanjeh, ĩjeéh ma túi jumúú. Nihat Jesúsdi h túi wúbhñitbut biíc yoobó ĩ chãja naáh. ²³ Jenah joicánnit ĩ míic jũihñuchah, ma joyáh bojoó. Beh joicánjeh, míic wúbh joinít, queétjeh chah ĩ míic jũihna caá. ²⁴ Obohjeéhtih, Dios naáwát di h bohéniboodí h míic jũihcat caá náahap. Pánih jũihcan, nihatdih túi chãjnit, túi bohénit, biíc mantjeh íjcan táinijeh jumat caá náahap. ²⁵ ã naáwát di h joíihcan, mácah niijnít di h íjcanjeh túi bohéat caá náahap. Páant táinijeh ñi bohénachah joinít, Dios ã teo wáacatjĩh ĩ yap yohatdih cádahna, táini bohéatboodí h “Caán yoobópdih caá”, ĩ niij jenah joibípna caá. ²⁶ Pánihna, yoobópdih bohéat di h joinít, queét nemépwã ĩ maáh ã náahat pah chãjnitji caandíh ĩ cádahbipna caá. Pánih cádahnit, ã jwúub yéej chãjat táutuchah yuhna, yoobópdih bohéat di h jepahnit, ã wútatboodí h ĩ jepahcan niít, buca.

3

Péeni yeó jáap di h ded pah cãacwã ĩ jumat pínah

1 Bũũ, Timoteo, nindihbut ma túi náhninaá: Jesús ã jwúub dei jũúwát pínah jãtih, cãacwãdih búdí bũwat ã jũmbipna caá. 2 Caán láa, cãacwã bitadih teo wáacat pínahdih jenah joicán, ã weñat pínahdihjeh ã jenah joibípna caá. Pánih jenah joinít, dawá bíí déedih ã bidbipna caá. “Nihatdih jéihna, bitadih chah wã jũmna caá”, niúj jenah joinít ã jũmbipna caá. Cãacwãdih, Diosdihbut yeejép wéhenit, ã mánadihbut yap yohnit ã jũmbipna caá. Bitá queédih ã túi chãjachah yũhna, “Túina caá”, niijcánnit ã jũmbipna caá. Diosdih wẽicanjeh, búdí yeejép chãjnit ã jũmbipna caá. 3 Cãacwãdih oican, ã jĩgah en teo wáaccan niít. Yeejép doonádih naóhñit ã jũmbipna caá. ã jenah joyátjĩhjih yeejépdih ã jéih chãj cádahcan niít. Cãacwãdih tabit yeejép chãjnit, táiniboodíh ã en iibípna caá. 4 ã chéenwãdih yah buca yeejép ã chãjbipna caá. Jenah joicánjeh chãjnit, “Jéih beedáni caá”, niúj jenah joinít ã jũmbipna caá. Queét ã weñat pínahdihjeh chãjnit jũmna, Diosboodíh náahcannit ã jũmbipna caá. 5 Cãacwã ã enechah, Diosdih túi wẽinit pah jíghñit jũmna yũhna, ã jenah joyátdih ã túut nuumát pínahdih ã náahcan niít. Pánihnitdih ma pej jũmca bojoó.

6 Biquína pánih chãjnit bitaíh mũunádih waadnít, “Dios naáwátdih yeebdíh bohénadih wã jũúwáp be”, caanjĩh jũmñit yaáhdih ipĩ niúj yeena caá. Páant ã niúj yeenachah yũhna, queét yaádh túi jenah joicánnit, yeejép chãjnit jũmna, ã yee bohéátdih ã wẽi joiná caá. Queét yaádh búdí ã yéej chãjĩhna caá. 7 Pánihna, dedé mácah yee bohéátdih joíĩhna, Dioíh yoobópdih bohéátboodíh ã náahcan caá. 8 Jon jãtih Egiptodih moón jióhñitji, Janes,

Jambres wūt jumnit, Moisésdih ãt yap yohíhip wūt yuh jĩ.* Páant ã yap yohíhat pah muntih queét yaáhdih yee bohénitboó túini bohéátdih ã en iiná caá. Queét yeejépdihjeh jenah joinít ã jumna caá. Pánih jumna, Jesúsdihtúí jenah joicán, áihwã yoobát ã nihcan caá. ⁹ Queét ã yee bohé jibichah yuhna, daocánnitjeh queétdih ã jepahbipna caá. ã yee bohéátdih “Caán yeejép bohéát caá”, cáacwã ã níj jéhibipna caá. Janes, Jambresjĩh ã yeeatjidih jon jãtíh moón ã jéihyat pah muntih, Jesús ã jwáub dei jũwát pínah jãtíh jumnitbut ã yeeatdih ã jéhibipna caá.

Timoteodih ã jwáub wutat

¹⁰ Obohjeéhtih, ded pah wã bohéát, wã jummat, wã jenah joyátdihbut meemjéh ma túí jéihna caá. Jesúsdihtúí jenah joyátdih, íjat wihcanjeh cáacwãdih oina wã teo wáacat, yeejép yapna yuhna wã cádahcatdihbut ma jéihna caá. ¹¹ Weemdíh yeejép ã chãjachah, búdí wã yéj chũúátjidihbut ma jéihna caá. Antioquía, Iconio, Listra tútchinaboó Jesúsíh doonádh wã jib bohéát jíib, weemdíh yeejép ã chãjatjidihbut ma jéihna caá. Obohjeéhtih, ã mawíhichah yuhna, jwĩ Maáh Jesúsboó weemdíh ã wapachah, ã jéih maocap jĩ.* ¹² Páant weemdíh ã chãjat pah, nihát Jesucristoíhwã caandíh ã túí péeat jíib, bita queétdihbut yeejép ã chãjat pínahdihbut jwĩ jéihna caá. ¹³ Yeejépwã, yeenitbut chah yeejép chãjnit ã jumnipna caá. Bitadh yeena, queétjehbut ã yeeatdih joiná, chah yeejép ã jumnipna caá.

* **3:8** Ex 7.11 * **3:11** Hch 13.14-52; 14.1-20

14 Obohjeéhtih, ma éet, ma íin, weembút meemdíh jwĩ bohénachah joiná, meémboó mat táí jepahap wat jĩ. “Weemdíh bohénit yeenit nihcan caá”, niíj jéihnit, yoobópdih jwĩ bohéátjidih táí náhninit, ma pée cádahca bojoó. 15 Meém wébít jum láa, Dios naáwát dih mat jéih jwíhip wat jĩ. Pánih jéihnit, Jesucristodih táí jepahnit, iiguípna bejni déejidih Dios ã táí ubni ma jumna caá. 16 Dios naáwát dih nihat daácnitdih “Nin pah ma niíj daacá”, Diosjeh át niíj daacát túutup wat jĩ. Pánihna, ã daacátjidih jwiútdih bohéat caá náahap, yoobópdih naáwát dih jwĩ táí jéihyat túut niijná. Pánih jéihnit, “Caán yeejép wã chãjatdih cádahat caá náahap”, jwĩ niíj jéihna caá. Caandíh bohéna, táiniboodíh jwĩ jéih túut nuumná caá. Pánihna, yeó jáap jummat pah táí chãjat túut niijná, ã naáwát dih bohéat caá náahap. 17 Ded Dios naáwát dih táí míic bohéna, nihat táinidih ã jéih chãjbipna caá.

4

1 Jesucristo, nihat cãacwã ã Maáh jwúub dei jũóhna, báadhnit, wannitbut ded pah ã chãjatji jíib ã naóhbipna caá. Pánihna, caán, ã íip Diosbut ã enechah, meemdíh nin pah wã wěp naóhna caá: 2 Yeó jáap jummat pah cãacwã ã joíhichah, ã joíhcah yuhna, Dios naáwát dih páantjeh ma bohénaá. Pánih bohéna, cãacwã ã yéej chãjatdih jéihyanit, “Jwúub yéej chãjcanjeh, táiniboodíh ñi túut nuumá”, ma niíj naáwá. Pánih naóhnit, chucánjeh, queédih ma táí bohé cádahca bojoó. 3-4 Túttimah bóo láa, cãacwã táini bohéát dih ã joíhcan niít. Pánih joíhcan, ã náahatdihjeh chãjéhna, ã weñat pínah bohéát dihjeh joíhnit, mácah bohénitboodíh bádí ã

bidbipna caá. Páant ï bidichah, dawá queédih ï yee bohéipna caá. Túini bohéatdih cádahnit, mácah bohénit ï jenah joyátjĩhjih ï bohéatboodih ï joibípna caá. Páניהna, waícanjeh páant ã yapat pínahdih jéihnit, meémboó Dios naáwát, yoobópdił jũmnidih, ma bohé cádahca bojoó. ⁵ Páניה bohénit, queét yeenit pah chãjcat túut niijná, túi jenah joiní ma jũmũá. Yeejép yapna yũhna, biíc yoobó chãjnit, túini doonádih ma bohé cádahca bojoó. Páניה cádahcan, Dios meemdih ã wũtat pah ma túi chãj péanaá.

⁶ Weém Dios ã wũtat pah, ã naáwátđih wã jib bohéatji jíib weemdih ï mao yohat pínah bahnijeh caá ã jũdhũp. ⁷ Wã wũnat pínah jãtĩh nin pah meemdih wã naóhna caá: Jesúih túini doonádih Dios weemdih ã bohéat túutuchah, wã túi bohénap be. Nihat ã wũtat pah wã chãj péanap be. Páניה chãjnit, yeejép yapna yũhna, caandih wã túi jenah joí cádahcap be. ⁸ Páניהna, wã túi chãjatji jíib jwĩ Maáh jeáboó ã bíboh pãina nacaá. Nihat cãacwã ded pah ï chãjatđih jéih beedána, yoobópdił jíib wũhni jũmna, ã wũtatđih wã túi jepahatji jíib, ã jwũub dei jũóhni yeó jáapđih weemdih ã túi chãjbipna caá. Bitã caandih oinitbũt ã jwũub dei jũúwát pínahđih túi pãinit ï jũmũchah, jwĩ Maáh Jesús biíc yoobó queédih ã túi chãjbipna caá.

Timoteo ded pah ã chãjat pínah

⁹ Waícanjeh wã pebhna ma jũúwá. ¹⁰ Demas wũt jũmni chah dawá bií déedih náahna, weemdih cádahnit, Tesalónica tútchina ã jwũub bejep be.* Crescente wũt jũmni Galacia baácna ã bejehchah,

* **4:10** Col 4.14; Flm 24

Tito wūt jumnibut Dalmacia baácna ã bejep be.*
 11 Páant ĩ yoh bejat túttimah, Lucasjeh caá wãjeéh
 ã chãwáp.* Pánihna, bita teo wáacnitdih náahnit,
 meemdíh wã jũúwát túutna caá. Pánih jũóhnit, Mar-
 cosdihbut ma namah jũúwá.* Cristoíh doonádih
 wã bohénachah, weemdíh túi teo wáacni pínah caán
 ã jumnipna caá. 12 Tíquicodih Éfeso tútchina wã wa-
 hap be.* 13 Ninna jũóhna, Troas tútchiboó* Carpo
 wūt jumniíh mædíh wã jwej jũóhni cáubh jweyát
 chóodih, wíih papélah tólihnadibut ma ub jũúwá.
 Wíih papélah náonadih bácah búdí wã náahna caá.
 Pánihna, caandíhbut ma ub jũúwá.

14 Alejandro wūt jumni ítahdih teoni weemdíh
 búdí yeejép ã chãjap be.* Páant ã chãjatji jíib Dios
 caandíh ã peéh chãjbipna caá.* 15 Caán Alejandro
 jwí bohéatdih búdí ã yap yohna caá. Pánihna,
 caandíh ma túi chãja chaáh, meemdíh yeejép ã
 chãjcat pínah niijná.

16 Roma tútchidih moón ĩ maáta weemdíh ĩ
 jwíih úbh joyóchah, wã chãjatjidih wã bohéatdihbut
 queétdih wã naáwáchah, det weemdíh teo wáacnit
 pínah ĩ wihcap be. Úmmit, nihat weemdíh ĩ
 cádah bejep be. Obohjeéhtih, páant weemdíh ĩ
 cádahachah yuhna, Dios queétdih ã peéh chãjca bojo
 naáh. 17 Weemdíh páant ĩ cádahachah yuhna, jwí
 Maáh Jesúsboó ã teo wáacap be, ãih doonádih wã
 naóh beedáát pínah niijná, nihat judíowã nihcan-
 nit ĩ joyát pínah niijná. Jiowã panihnit weemdíh

* 4:10 2Co 8.23; Gá 2.3; Tit 1.4 * 4:11 Col 4.14; Flm 24 * 4:11
 Hch 12.12,25; 13.13; 15.37-39; Col 4.10; Flm 24 * 4:12 Hch 20.4;
 Ef 6.21-22; Col 4.7-8 * 4:13 Hch 20.6 * 4:14 1Ti 1.20 * 4:14
 Sal 62.12; Ro 2.6

ĩ mao yohat déedih ã túi wapap be. ¹⁸ Nihat weemdih yeejép chãjnitdih yap yohnit, jwĩ Maáh weemdih ã wapbipna caá. Pánih wapnit, jeáboó maáh ã jumupna weemdih ã túi bejat túutbipna caá. Páניהna, yeó jáap jumap pah “Caán chah túini, chah wēpni Maáh caá”, jwĩ níj jíih. Páant tíi ã jumunah.

Ã pée túyat túutat

¹⁹ Prisca, Aquila, * Onesíforo* ã pebh moonbút ĩ túyunaá. ²⁰ Erasto* Corinto tútchiboó ã chãwáp jí. Trófimo* Mileto tútchiboó tubúp chũhñit, ã chãwáp jí. ²¹ Meémboó mah noój láa játih waícanjeh ma júúwú. Eubulo, Pudente, Lino, Claudia, nihat bita Jesúihwãbut meemdih ĩ túyat túutna caá.

²² Jwĩ Maáh Jesucristo majeéh ã jumunah. Dios yeéb nihatdih oinit, ã túi teo wáaca naáh.

Páant bóojeh tigaá wã naáwát.

Pablo

* **4:19** Hch 18.2,18 * **4:19** 2Ti 1.16-17 * **4:20** Hch 19.22; Ro 16.23 * **4:20** Hch 20.4; 21.29

Dios ã jáap naáwát tólih New Testament in Cacua

copyright © 2008 Wycliffe Bible Translators, Inc.

Language: Cacua

Translation by: Wycliffe Bible Translators, Inc.

Copyright Information

© 2008, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Cacua

© 2008, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-08-06

PDF generated using Haiola and XeLaTeX on 11 Nov 2022 from source files
dated 29 Jan 2022
34c9543b-57a6-5290-ab7b-4fa15529a7e2